

Fundacion Lanta Papiamento:

“Planificacion di Papiamento na bienestar di comunidad, gobierno y enseñansa”

ORANJESTAD - “Desarroyo di un bon maneho y planificacion di idioma ta na bienestar di tur sector den comunidad, di gobierno y special di enseñansa.”

Esaki Fundacion Lanta Papiamento (FLP) den preparacion pa e Conferencia Internacional di Lengua di Caribe di dia 5 pa dia 8 di augustus proximo. Pe conferencia aki FLP a forma un Comision

Organisado Local (COL) Na e conferencia publico ta haya hopi informacion cientifico di diferente idioma di Caribe. FLP tin como meta primordial di conscientisa pueblo di Aruba tocante Papiamento cu

ta idioma oficial, idioma nacional di Aruba y idioma materno di e gran mayoria di e poblacion di Aruba. FLP ta ripara cada bes cu e trabou di duna informacion na pueblo y di conscientisa

nos hendenan mester sigui. Esey ta loke e fundacion kier haci.

Organisacion

COL hunto cu Biblioteca Nacional Aruba, Instituto Pedagogico Arubano, Departamento di Cultura Aruba, Departamento di Enseñansa, Universidad di Aruba, Grupo di Corector di Papiamento y Fundacion Bon Nochi Drumu Dushi ta traha estrechamente cu e organisadonan principal di e conferencia. E organisadonan aki ta Society for Caribbean Linguistics (SCL), Society for Pidgin and Creole Linguistics (SPCL) y Associação de Crioulos de Base Lexical Portuguesa e Espanhola (ACBLPE).

Actividad educativo

FLP ta realiza un variedad di actividad educativo y cultural pa yega na su meta. Por ehempel recientemente FLP a ofrece pa di dos biaha un les publico di Papiamento. FLP ta organisa entre otro charla tocante topico linguistico y literario, evento literario, cultural, educativo y concurso di ortografia. E proximo actividad riba agenda di FLP ta un conferencia linguistico internacional.

Directiva FLP

Actualmente directiva di FLP ta consisti di Rensley Mathilda (presidente), Candelaria Dirks (vice presidente), Etlien Croes (secretario), Gilbert Damian (di dos secretario), Josephina Maduro (tesorero), Robert Nieuw (di dos tesorero) y e miembronan Bertha Wolff, Julie Thodé y Glenda Reiziger.

Fundacion Lanta Papiamento ya tin 5 aña ta boga pa cambio di acercamento, posicion y maneho relaciona cu Papiamento y pa mehoracion y desaroyu di e status di idioma Papiamento, tanto localmente como internacionalmente. Pa yega na e meta ta traha riba cooperacion y intercambio di informacion cu otro organisacion den Reino cu tin un meta similar. FLP tin partner manera Fundashon Akademia Papiamentu di Corsou, Fundashon Alsa Papiamentu y Fundacion Dushi Papiamentu di Boneiro y Fundashon SPLIKA di Hulanda. Hunto cu e fundacionnan aki a constitui Plataforma Union di Papiamento.

Trahando hunto cu e organisacionnan aki FLP ta trata na crece, siña mas, logra mas y yega na un publico grandi. FLP ta traha hunto cu diferente organisacion local tambe pa asina amplia cada bes su red social y busca oportunidad pa por sigui traha di un manera dinamico. □